

**Date – 21/02/2026**  
**Time - 7:30 -7:40 Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Chief minister Pu Lalduhoma'n Mizoram din thàr lehna tur hmarua chu beiseina a ni a ti.
2. Chin National Day vawi 78 na nimin khan Durtlang ah hman a ni a, Pu C. Ngunlianchunga, MLA in a hmanpui.
3. Manipur BJP MLA Pu Vungzagin Valte chu nimin tlai khan a thi.
4. India AI Impact Summit 2026 chu nizan khan New Delhi-a Bharat Mandapam ah khar a ni.

<><><>

CM

Chief minister Pu Lalduhoman Mizoram din thàr lehna tur hmanrua chu beiseina a ni a ti.

Nimina Aizawl Lammuala State Day of Prayer hmannaah he thu hi sawiin Pu Lalduhoma chuan beidawna hi setana hmanrua a ni a, beiseina hi Pathian hmanrua a ni, a ti.

Pu Lalduhoma chuan, mi tam tak chu ram roreltuteah an beidawn tawh thu leh platform hrang hrangah hruaitute dukhawp lohna leh ram rorelnaa phunnawina a tam tawh thu a sawi a, tu party pawh sorkar se engmah an ni chuang lo ang tih beidawna ri a ring hle a. Vawiinah hian indin thar lehna turin beiseina neih a ngai a ti. Mizoram zimteah kohhran hrang hrangah tual upa chin chunglam rawngbawltu sing 3 chuang an awm tih sawiin beidawn tur an ni lo a ti a ni.

A thusawi thupui tur atan 'Ka thlarau zawkin le' tih a thlan thu Pu Lalduhoma chuan a sawi a, kum 5 lo awm leh tur atana India ram state-ten pawisa an hman tur zat chu 16th Finance Commission-in an rel a, Parliament-a an pharhah chuan state 28 zinga state 19-in a hmaa an dawn zat an pha tawh lo a, state 9 chauh a hmaa dawn zat aia sang dawng an awm a, chumi zingah chuan Mizoram a tel tih sawiin hei hi thlarau hnathawh a ni lo tih sawi theih a ni a ti.

Chief Minister Pu Lalduhoma chuan thlarau zawk hnathawh an rin thiam phawt chuan a rawn thleng zel dawn tih a sawi a, ram leh hnam tun din an sawirual hian Mizote sakhuana, thlarau nun leh mahni theuhah temple tun din hmasak a ngai tih sawiin, Mizoramah Pathian ram lo thleng rawh se tiin an au thin a, mahniaah a thlen hmasak a ngai a ni, a ti a; kum 2024 leh 2025-a State Day of Prayer an buatsaiha mipui tawngtainate chu chhanna a awm thu sawiin, An inngahna tur chu Pathian thu hi ni rawh se a ti bawh.



## OIL PALM

Agriculture & Farmers' Welfare minister Pu PC Vanlalruata chuan Lawngtlai district-a Liapha khuaah Oil Palm Mill bun thar tumin hma an la mek thu a sawi.

Assembly zawhna ziaka chhangin Agriculture Minister he thu hi a sawi a, Mizoramah Oil Palm Mill bun turin Patanjali Foods Limited-ten Lawngtlai district-a Liapha khuaah hma an la mek, a ti.

Agriculture Minister hian Godrej Agrovet Limited leh Patanjali Foods Limited ten kut hnathawktute hnen atangin Oil Palm rah an lei sak mek thu a tarlang baw k a; National Mission on Edible Oils-Oil Palm (NMEO-OP) scheme-in formula price a siam hmangin Oil Palm rah hralhna man bithliah thin a nih thu leh, thla tin a hralhna man hi a danglam thin thu a tarlang a, sorkar kum kal mekah company-te hian Oil Palm rah hi chawh rualin kg. khat Rs 14.13-in an lei thu a tarlang baw k.

*((VOICE CAST - Pu PC Vanlalruata chuan National Mission on Edible Oils-Oil Palm (NMEO-OP) scheme hmangin Oil Palm rah hralhna man puihna Viability Gap Payment (VGP) pek a nih thu leh VGP hmanga Oil Palm rah hralhna man puihna hi kum tin a danglam thu a tarlang a, kum 2022-23 atana tanpuina pek zat chu kg.-ah Rs. 3.05 a nih thu leh tunah hian 2023-24 atan kg.-ah Rs. 3.18 niin, sem chhuah tura buaipui mek a nih thu a tarlang a ni.))*



## CHIN NATIONAL DAY

Chin National Day wawi 78 na nimin khan Durtlang KV Multipurpose Hall ah hman a ni a, Pu C. Ngunlianchunga, MLA in a hmanpui.

Pu C. Ngunlianchunga chuan thu sawiinm pipu hun aţang tawhin Chin State leh a pawnah hian ram zau tak an nei a. Chu ram zau tak chu a belkhawmin East Chinland an ti a. Chutiang a ralmuang taka an khawsak laiin Sipai Sorkar (Junta) avangin Myanmar a buai a, khawvel hmun hrang hrang ah an awm darh alo tul a, khawi hmun ah pawh awm se mahni chhuahna ram, tu nge an nih tih hi an hriat reng a tha ani ti a. Mizoram ah pawh Chin unaute mi tam tak an awm a, inlungualna nen inhmangaihna nen chen ho a tul a, Chibil, Hnam bil ah buai lovin Chhulkhat chhuak vek an nihna ah lungawi thiam a, hahdam taka chen ho zel a tha ati.

Chin National Day hi February 20, 1948-a General Assembly of Chinland hriatrengna atan hman a ni a, Myanmar chhim lama Chin hnam peng hrang hrang ten an hnam ziarang leh an inpumkhatna lawmna ni ah an hmang thin ani. Chin National Day hmanna hi ZORO, MSU leh LSA hruaitu ten an telpui baw k.



## KHAWZAWL

Khawzawl District National Highway 06 Package III Missing Plot, chungkaw 5 te chuan NHIDCL in an ram lak zangnadawmna cheng nuai 200 chuang an la pek loh thu sawiin, tun thla chung ngeia an pek loh chuan an

thla thar an ram chhunga NH 06 kawng chu lirthei tlan theih lohva siam an tum tih an sawi.

Khawzawl District National Highway 06 Package III Missing Plot chhungkaw 5 te hian thuneitute nen vawi tam an indawr tawh hnuah leh kum 4 dawn lai a liam tawh chunga an ram lak zangnadawmna an la hmuh loh vanga lungawi lohna lantirnan an ram chhungah NH06 kawng an dang a. Lungawi lohna an lantirnaah buaina a chhuah lohna turin thuneitute pawhin an vil a ni.

Ram neitute chuan tun thla chhunga an la lo a nih chuan thla thar March atangin an ram chinah NH-06 kawng tlangtir an phal tawh bik lo tih an sawi a, JCB in kawng hi thla tharah an lai chhe dawn tih an sawi a ni.

<><><>

#### HANHOLDING SCHEME-GINGER

Mizoram sorkar flagship programme Bana Kaih Scheme kaltlanga kut hnathawktute sawhthing lei leh hralh kalpui mekah sorkarin sumdawngten kut hnathawktute sawhthing an leisakna tur hniam ber a bituk chu chawhrualin cheng 32 leh pawisa 56 a ni mek a; Handholding chungchanga Adviser to CM Dr. KC Lalmalsawmzauva, Mizoram Agriculture Marketing Board Co-Chairman ni bawk chuan kut hnathawktute kuta kg khata cheng 50 luhtir chu sorkar thupui a nih thu a sawi.

Dr. KC Lalmalsawmzauva hian tun hnaia Akashvani News Aizawlin a kawmnaah, Bana Kaih Scheme kaltlanga ‘sawhthing lei leh hralh’ tihin a tum ber chu kut hnathawktu Mizoram mipui zaa 60 vel bawrten lei rem an lo rah ve theih nan sorkar chu sumdawngte leh sawhthing chingtute suihsawmtu facilitator a nih thu a sawi a; nikum khan February ni 20-ah kan kalpui tan a, kuminah chuan Februaru ni 2-ah kan kalpui. Sorkar chuan kan lo sawi tawh angin kut hnathawktute kuta Rs 50 a luh dan tur kha kan thupui a ni mai a, engpawh lo thleng se sorkar chu a inbuatsaih a ni, a ti.

Sumdawngte leh sawhthing chingtute inkara sorkar a inrawlh chhan sawiin Dr KC Lalmalsawmzauva chuan, tun hma zawng khan sawhthing chingtute chu vai sumdawngten an duh zat rate-in an leisak thin a, kut hnathawktute an tangrual thei si lo a, chuvangin sorkarin support price nen an thlavang a hauhsak a lo ngai ta a ni, a ti a; kut hnathawktute society-a an awm tirna chhan chu sawhthing man thu hla leh thil dangah an tanrual theihna tur a nih thu a sawi.

Society chu kut hnathawktute tan a nih thu leh sumdawngte leh kut hnathawktu society-te chu a tam thei ang ber indawr se tih chu sorkar duh dan leh hmahlir a nih thu a sawi bawk a; sorkar chuan target a siam a, nikum khan a bul tanna a nih avangin a pulunga sawhthing lei a ni a, kuminah a sawngbawlina din uar niin, nakum lamah uar zawka a chin dan tha inzirtirna kalpui leh tum a nih thu a sawi bawk.

<><><>

#### PRASHASAN GAON KI ORE

Lunglei District Bawrhsap bul tuma mipuite'n an kawtkaiyah ngei an mamawhna zawna sawrkar an dawr theihna, "I Kawtkaiyah Sawrkar" (Prashasan Gaon Ki Ore) chu tunkar khan Lungsen RD Block chhunga

Lungrang South leh a chhehvel khaw mipuite tan Lungrang South Community Hall-ah buatsaih a ni.

Lungrang South Village Council President Pu Lalmawizuala'n hun a kaihruai a, official ten an kalphung tur an sawifiah a ni.

Lungrang South-a "I Kawtkaiyah Sawrkar" hun buatsaihah hian department hrang hrang — Deputy Commissioner Office, Block Development Office, Health & Family Welfare, AH & Veterinary, Agriculture, Horticulture, Power & Electricity, Land Revenue & Settlement Department leh Mizoram Rural Bank te'n stall hawngin, awlsam zawka mipuite dawr theih turin an inpho chhuak a. Lehkha pawimawh hrang hrang -Aadhaar, ST/Residential/Income Certificate, Job Card, Land Pass, siam thar leh siam that te, bank account hawn thar leh service hrang hrang te, mihring leh ran inentir leh hri danna pek te, sawrkar ruahmanna hrang hrang chungchang inzirtirna leh inziah luhna te buatsaih a ni a.

He'ng service hrang hrang chhawp chhuahte hi mi 750 velin an chhawp tangkai a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MANIPUR MLA

Manipur BJP MLA Pu Vungzagin Valte chu nimin tlai khan a thi. Pu Vungzagin Valte hi Medanta Medicity Hospital, Gurgaon ah hun engemawchen enkawl anih hnuah nimin tlai dar 5:50 khan a thi a ni.

Pu Vungzagina hi Manipur politics-a Zofate zinga hriat hlawh a ni a. Kum 2023 May ni 3 a Manipur khawpui Imphal-a tualchhung buaina a chhuah khan mi kut tuarin a awm a. He a hliam tawrh hi hun rei tak enkawl niin kumin February ni 8 khan New Delhi panpui a ni a. Rei tak enkawl anih hnuah nimin khan a thi a ni.

Pu Vungzagin Valte hi Manipur state chung leh pawna Zohnathlakte atangin ui tu a ngah hle a ni.

<><><>

PAX SILICA DECLARATION

India AI Impact Summit 2026 chu nizan khan New Delhi-a Bharat Mandapam ah khar a ni a. Union Electronic and IT Minister Ashwini Vaishnaw chuan chanchinbumite kawmin AI Impact Summit chu kawng hrang hrangah a hlawhtling hle a ti a. Mi nuai 5 chuangin he Summit chung hian exhibition an flawh a ti a. Thil tam tak an zirchhuah bakah mithiam tak takte nen hun an hmang ho thei a ni a ti.

**Pu Vaishnav chuan he Summit ah hian khawvel huap pawha AI lama mi thiam chungchuangte an lo tel tam hle a ti a. Ramchung thalaiten Summit an hlut avangin lawmthu a sawi a ni.**

**AI Summit tawp ni nimin khan India leh US chuan Pax Silica declaration an ziaak a. He declaration avang hian ram pahnihte mineral vang chi leh semiconductor siamchhuah lamah chak zawkin an thawkdun ang a, Artificial Intelligence AI than chhoh zelna leh silicon leh technology ecosystem tha leh him siam kawngah a pui dawn a ni. He inremna ziahna hun hi Union Minister of Electronic and Information Technology Ashwini Vaishnav chuan a kaihruai a. Thusawiin India in a tum ber chu Semiconductor leh Electronic Industry ah a hmahruaitu anih thu a sawi.**

<><><>